

COLUMNA

Mes stgalfins da biro

SANDRO BUCHLI/FMR

Mes stgalfins èn brins. Brins sco tubac. Il model da stgalfin sa numna: Arizona. Arizona, la terra dal Grand Canyon. La marca dals stgalfins: Birkenstock, natiralmain. Birkenstock sco tut ils hipsters, moralists ed utopists. «U sco tut ils scolasts», m'aveva ditg la collega da lavur. Mes stgalfins. In pau chars. I dattan da discurrer. Kleider machen Leute. Il privat è politic. Stgalfins èn politics.

«**E**n bleras interpresas (sche betg gist bancas e segiradas) datti ils tips u las tippas che van a spass en stgalfins e passentan en stgalfins l'entir benedì di en il biro» m'aveva ditg mia collega da lavur. Ils stgalfinofils entran la damaun cun chalzers tschufs e bletschs en biro e laschan lura tuffar ora quels l'entir di. E tiran en ils stgalfins ch'èn uschiglio tut pers sut il pult. Els aman lur stgalfins. Jau am mes stgalfins.

«**Q**uels che portan stgalfins en biro, quels na lavuran betg propi gugent e betg propi bler, els fan be sco sch'els lavurassan», m'aveva ditg mia collega. Zackerzucker, tge reproscha. Jau guard giu sin mes stgalfins e ditg ad els, «chars stgalfins, vus na as empudais nagut persuenter».

Il tip da tes stgalfins ta tradescha immediat:

Adilettas = sportiv, cultic, ma inabanausa da moda. I dat sper il model blau er il model en cotschen, e clerblau e mellen et cetera et cetera.

Flipflops cun si palmas e fluras e cactus = superlæssigs, ma in pau lègere per in job serius.

Birkenstock = apunto, sco ditg, moralists, scolasts ed utopists.

Stgalfins da wellness alvs cun si il logo dal hotel: Ti es in lader! – betg adattads per il biro.

Ma sacrament! Èsi insumma adattà da purtar stgalfins en biro, ma dumond jau? E lura fiss qua anc la dumonda spinusa, schebain ins dastga purtar soccas en ils stgalfins...

Il di da biro è gia passà – stemplar ora. Jau mid puspè sin mes chalzers – e lasch mes stgalfins brins sut il pult. Hai jau insumma lavurà oz? Jau vom a chasa, finalmain – en mes stgalfins da chasa. Era brins, era Birkenstock, er in pau chars. Ed i n'interessescha nagin. I na dattan betg da discurrer. Ed i dat er nagin che scriva ina columna davart stgalfins (!) en questa gasetta: tge chaussas!

Equai è er bunamain in pau lungurus.